

Mazarin

2493

Le Mort De Terre Ov  
Le Bras Hors De Terre ...


**RARE BOOK  
COLLECTION**



**THE LIBRARY OF THE  
UNIVERSITY OF  
NORTH CAROLINA  
AT  
CHAPEL HILL**

Mazarin  
2493

UNIVERSITY OF N.C. AT CHAPEL HILL



00023006792



2  
19

LE  
MORT DE TERRE  
OV  
LE BRAS HORS  
DE TERRE,

EN VERS BURLESQUE.

A PARIS,  

---

M. DC. XLIX.






THE  
MORT DE TERRE  
OF

LE BRAS  
DE  
PARIS

A PARIS  
MDCXIX





# LE MORT DE TERRE

O V  
LE BRAS HORS DE TERRE,

*EN VERS BURLESQVE.*

**I**E Chante, non pas en Musique  
Vne Chançon bien fantastique  
Sur le chant tire la lira  
Qui ne pourra chanter lira :  
Que penseriez vous que ie chante  
Ou que i'escriis, que ie ne mente  
De grace deuinez le bien  
Car par ma foy ie n'en sçay rien.  
On dit & ie le veux bien croire  
Et que chacun en ayt memoire,  
Car c'est à la posterité  
Que l'on chante la verité :  
On dit donc, & point ie n'en doute  
Et ie le dis quoy qu'il en couste  
Sans l'auoir veu n'importe pas,  
Qu'un homme mort montre son Bras  
Ne voila pas grande merueille  
C'est bien matin qu'il se reueille,  
Pour moy ie m'estonne comment  
Il n'attend iusqu'au iugement,  
Mais qu'il dise ses patenostes



S'il à plus hastes que les autres,  
 Et qu'il se leue de ce lieu  
 Et s'en aille sans dire adieu,  
 Le plustost qu'il le pourra faire  
 C'est bien le mieux qu'il fasse affaire.

I'ay bien peur que malgré ses dents  
 Il n'y demeure bien long-temps,  
 Et toutefois il s'en retire  
 Je vous parle par ouy dire  
 Vous estes tous des innocens  
 Si vous n'en croyez pas les gens,  
 Ce sont des gens qui vous en iurent  
 Je ne sçay pas s'ils se parjurent,  
 Cen'est pas l'ordinaire aux gens  
 De iurer en se parjurants,  
 Moy qui vous conte cette histoire  
 I'en croist tout, ce que i'en dois croire  
 Vous autres aussi croyez moy  
 Je suis garçon digne de Foy.

Je vous dis donc qu'on vit par terre  
 Je vous parle depuis la guerre,  
 Vn homme à la voirie à tort  
 Je vous parle d'un homme mort,  
 Je croy qu'il n'auoit plus de vie  
 Je vous en parle sans enuie,  
 Qui fit pour tout signe du doit  
 Qu'on luy donnast à boire vn doit,  
 Moy deuant que ie vous acheue  
 I'en dis de mesme, & bon le treuve  
 Qui le treuve bon qui voudra  
 Qui fera comme moy boira;  
 Enfin apres la soif passée

L'Histoire

RBC  
Ncu



L'Histoire ainsi recommancée :  
 Vous dira que maint curieux  
 Ne demeurèrent pas chez eux ,  
 ils accoururent tous par bande  
 Sçauoir ce que ce mort demande,  
 Peu s'en fault que tout alors  
 Ne reprit armes sur le corps,  
 Tant la nation Parisienne  
 Est maintenant guerriere & vaine,  
 Et n'eust esté qu'il estoit mort  
 ie croy qu'il eust tremblé bien fort,  
 Chacun y court, chascun l'entoure  
 Mais qui voudra courir y coure,  
 pour moy ie suis trop fatigué  
 Depuis que Paris fut bloqué,  
 Et j'ayme bien mieux tout entendre  
 Que de l'aller voir pour apprendre,  
 Et ce ne seroit iamais fait  
 D'aller voir tout ce qui se fait,  
 Car chacun se mesle de faire  
 Et foin ie ne me sçauois taire,  
 Et si ie voulois dire tout  
 Ie n'en viendrois iamais à bout,  
 Il me suffira de vous dire  
 Et cela ie le dis sans rire,  
 Que tout Paris à veu ce bras  
 Que la terre ne couuroit pas.  
 Il iouïoit mal à la cachette  
 S'il eust esté dans sa pochette,  
 Personne ne l'eust aperçeu  
 Moy qui le dit n'en eust rien sçeu,  
 Ce fut quelque badault peut estre



Qui le premier le vit paroître,  
 Et ne pouuant celer cela  
 A dit aux autres le voila,  
 Ie ne serois pas à l'Escrire  
 S'il l'eust recaché sans rien dire,  
 Mais puis qu'il nous la dit ainsi  
 I'ay bien voulu l'Escrire aussi,  
 Chacun en parle & en raisonne  
 La cloche de Sorbonne en sonne,  
 Et l'Escole des Medecins  
 A veu consulter les plus fins,  
 Et rechercher quelque remede  
 Pour vn mort qui crioit à l'aide,  
 Car plusieurs l'ont ouy crier  
 Et pour luy sont venu prier,  
 Quelqu'un qui le vit, & qui iure  
 Que sa main battoit la mesure,  
 Vn luy soustient, & ie le croys  
 qu'il faisoit des signes de Croix,  
 Tel qui la veu gratter la terre  
 Dit il fut iouieur de quiterre,  
 D'autres encor que ie croy mieux  
 Qui l'ont veu de leurs propres yeux,  
 Et qui sont sortys hors la porte  
 Disent qu'il faisoit la main Morte,  
 Enfin quelque deuot Chrestien  
 Dit qu'il estoit homme de Bien,  
 Quoy qu'on l'accuse de folie,  
 qui passe vn peu la raillerie,  
 Sçauoir que luy mesme il s'occit  
 Il fut bien fou quand il le fist,  
 Et plus fou qui voudroit l'ensuiure.



Et puis quireuoudroit reuiure,  
 Et tendant le bras comme luy  
 Diroit tirez moy hors d'icy,  
 Si l'on s'accoustumoit à faire  
 Souuent quelque pareille affaire,  
 Tous les morts sur terre, & sur mer  
 Voudroient mettre leur cul à l'air,  
 Qu'on verroit au clair de la Lune  
 Ala fin la chose importune,  
 Baste pour ce coup toutefois  
 que nul ny retourne deux fois,  
 Vistement quel'on le renuoye  
 Et n'aye peur qu'on le renuoye,  
 Si vous l'enterez comme il faut  
 Il ne reuiendra plus en haut,  
 Quoy qu'en veulent dire les mornes  
 qui disent qu'il à fait les cornes,  
 A celuy qui la recogné  
 Qu'il la de plus egratigné,  
 Je n'en sçay rien, mais les habiles  
 Qui sont pour la plus part bons drilles,  
 Et fort pieux enuers les morts  
 Sont d'auis qu'il demeure hors,  
 D'autant qu'il sert comme l'on pense  
 D'enseigne à la nouuelle France,  
 S'il est ainsi comme on le croy,  
 Beaucoup iront à ce Conuoy,  
 Où les Dames seront priées  
 Qui seront bien accompagnées,  
 Et selon leur condition  
 Y viendront en deuotion.

F I N.











